



ჯანმრთელობის დაცვის და სოციალურ საკითხთა
კომისიის სხდომის ოქმი №43

13 სექტემბერი 2024 წელი
14:00 საათი

ა/წ 13 სექტემბერს ქ.თბილისის მუნიციპალიტეტის საკრებულოში ჩატარდა ჯანმრთელობის დაცვის და სოციალურ საკითხთა კომისიის სხდომა.

სხდომას ესწრებოდნენ ჯანმრთელობის დაცვის და სოციალურ საკითხთა კომისიის წევრები:

1. ზურაბ ჩიკვილაძე;
2. შალვა ოგბაიძე;
3. ანა კაკაბაძე;
4. ნათია მოდებაძე;
5. ვახტანგ სურგულაძე.

მოწვეული პირები:

ქალაქ თბილისის მუნიციპალიტეტის მერიის ჯანდაცვისა და სოციალური მომსახურების საქალაქო სამსახურის უფროსი გელა ჩივიაშვილი.

სხდომის დღის წესრიგი:

- „ქალაქ თბილისის მუნიციპალიტეტის ტერიტორიაზე უსახლკაროდ რეგისტრაციისა და თავშესაფრით/საცხოვრისით უზრუნველყოფის წესის დამტკიცების შესახებ“ ქალაქ თბილისის მუნიციპალიტეტის საკრებულოს 2023 წლის 19 მაისის N25-28 დადგენილებაში ცვლილების შეტანის შესახებ“ ქალაქ თბილისის მუნიციპალიტეტის საკრებულოს დადგენილების პროექტი.

სხდომას თავმჯდომარეობდა ჯანმრთელობის დაცვის და სოციალურ საკითხთა კომისიის თავმჯდომარე ზურაბ ჩიკვილაძე. სხდომის თავმჯდომარემ სხდომა გახსნილად გამოაცხადა, დამსწრე წევრებს გააცნო ჯანმრთელობის დაცვის და სოციალურ საკითხთა კომისიის სხდომის დღის წესრიგი და სიტყვა გადასცა ქალაქ თბილისის მუნიციპალიტეტის მერიის ჯანდაცვისა და სოციალური მომსახურების საქალაქო სამსახურის უფროსი გელა ჩივიაშვილს. საკითხის წარმომდგენმა განაცხადა, რომ წარმოდგენილი ცვლილებების მიზანია, უსახლკარო სტატუსის მქონე ოჯახების მიერ ფართის მოძიების პროცედურებისა და ვადების უკეთესად გამოკვეთა, გამგეობების მიერ განსახორციელებელ ღონისძიებათა დაზუსტება და წესის ისე ჩამოყალიბება,



რომ რაც შეიძლება მოქნილი იყოს, როგორც განმცხადებლის, ასევე სამსახურისთვის, სამუშაო პროცესში.

წესის მე-3 მუხლი განიცდის რედაქციული ცვლილებას და პირველი პუნქტის შემდგომ ემატება 1¹ პუნქტი, რომლის მიხედვითაც, უსახლკარო სტატუსის მძიებელი პირის მიერ შევსებულ განაცხადს სამსახური უგზავნის ა(ა)იპ-ს განსახილველად. წესის მოქმედი რედაქციის მიხედვით, აღნიშნული ჩანაწერი წარმოადგენს მე-3 მუხლის მე-2 პუნქტის შემადგენელ ნაწილს, თუმცა, შინაარსობრივად მე-2 პუნქტში მოცემული ინფორმაციისგან დამოუკიდებელი გარემოებაა და საჭიროა გაწერილ იქნას ცალკე პუნქტის სახით. აქედან გამომდინარე, რედაქციულ ცვლილებას განიცადის წესის მე-3 მუხლის მე-2 პუნქტიც, რომელშიც, ამიერიდან ჩამოთვლილი იქნება მხოლოდ ის პირობები, რომელთაც პირი უნდა აკმაყოფილებდეს უსახლკარო პირად რეგისტრაციისათვის.

წესის მე-8 მუხლი, რომელიც ადგენს უსახლკაროდ რეგისტრირებული ოჯახების საცხოვრისით უზრუნველყოფის პროცედურას, განიცდის როგორც რედაქციულ ისე შინაარსობრივ ცვლილებებს. კერძოდ, მე-8 მუხლის მე-2 პუნქტში შედის ცვლილება და ჩანაწერი გამგეობისთვის მიწოდებული ოჯახების საცხოვრისით დაკმაყოფილების რიგითობის თაობაზე განსხვავებული ფორმით ყალიბდება, თუმცა, ახალი ჩანაწერის მიხედვითაც უცვლელი რჩება ის გარემოება, რომ ა(ა)იპ-ისათვის და გამგეობებისათვის მიწოდებული ოჯახების საცხოვრისით დაკმაყოფილების რიგითობა განისაზღვრება ქულის მიხედვით. ამასთან, რაც უფრო მაღალია ქულა, მით უფრო პრიორიტეტულია ოჯახის საცხოვრისით დაკმაყოფილება. მე-8 მუხლის მე-2 პუნქტის შემდგომ ემატება მე-3 პუნქტი, რომლის მიხედვითაც, სამსახურის მიერ ქულამინიჭებულ ოჯახებს გამგეობა დაუკავშირდება რიგითობის მიხედვით და განუმარტავს, რომ მათ აქვთ საცხოვრისის მოძიების შესაძლებლობა. აღნიშნული პროცედურისათვის განუსაზღვრავს გონივრულ ვადას, რომლის ამოწურვის შემთხვევაშიც, დაკავშირება მოხდება სიაში მის შემდეგ მდგომ ოჯახთან. იგივე მიდგომა გავრცელდება უკვე არსებულ სოციალურ საცხოვრისებში ფართის გამოთავისუფლების შემთხვევებზეც, კერძოდ, ქულათა სრული დამთხვევისას, ოჯახთან დაკავშირება მოხდება უსახლკარო ოჯახის სტატუსის მინიჭების თარიღით, იმ შემთხვევაში კი, თუ სტატუსის მინიჭების თარიღიც იგივეა, ოჯახის მიერ განაცხადის შემოტანის თარიღით.

დადგენილების პროექტის მე-8 მუხლის მე-4 პუნქტის მიხედვით, მას შემდეგ, რაც ოჯახი ფართს მოიძიებს, გამგეობა აგროვებს ფართის შესახებ სრულ დოკუმენტაციას, მათ შორის მოძიებული ფართის საკადასტრო კოდს, ფოტოებს, მესაკუთრის მონაცემებს, მდებარეობს თუ არა საცხოვრებელი/ბინა ავარიულ მრავალბინიან საცხოვრებელ სახლში და ა.შ. და აგზავნის სააგენტოში, შუამდგომლობით კონკრეტული ოჯახისთვის ფართის შეძენის თაობაზე.

წესის მე-8 მუხლის მე-5 პუნქტის სახით, ჩნდება ჩანაწერი იმასთან დაკავშირებითაც, თუ რომელი გამგეობა შეიძენს ფართს ოჯახის წევრთა განსხვავებულ იურიდიულ მისამართებზე რეგისტრაციისას. ჩანაწერის მიხედვით, ოჯახის წევრთა განსხვავებულ იურიდიულ მისამართებზე რეგისტრაციისას, ოჯახისთვის საცხოვრისის შეთავაზების უფლებამოსილება განეკუთვნება იმ გამგეობას, რომლის ტერიტორიაზეც უფრო მეტი ოჯახის წევრია რეგისტრირებული, ხოლო თანაბარი რაოდენობის რეგისტრაციისას, იმ გამგეობას, რომელსაც იმ ეტაპისთვის ნაკლები ბინა აქვს შეძენილი.



წესის მე-8 მუხლი განიცდის რედაქციულ ცვლილებას და მას გამოეყოფა უსახლკარო ოჯახის სტატუსის გაუქმების საკითხთან დაკავშირებული პუნქტები, რომლებიც თავს იყრის ახლად ჩამოყალიბებულ მე-8¹ მუხლში - „უსახლკარო ოჯახის სტატუსის გაუქმების წინაპირობები და პროცედურები“. დასახელების შესაბამისად, წესის მე-8¹ მუხლში მოცემულია ის გარემოებები, რომელთა არსებობის შემთხვევაშიც ოჯახს უუქმდება უსახლკაროს სტატუსი. კიდევ ერთი რედაქციული ცვლილება ხორციელდება ტერმინთა განმარტებით დადგენილი ტერმინების შესაბამისად, წესის მე-8 და მე-8¹ მუხლებში კორექტირდება ის ჩანაწერები, სადაც ნაცვლად ტერმინი „მთავრობისა“ - გამოყენებულია „ქალაქ თბილისის მუნიციპალიტეტის მთავრობა“, ასევე ნაცვლად „ა(ა)იპ“-ისა გამოყენებულია ჩანაწერი - „თბილისის მუნიციპალური თავშესაფარი.“

აქვე, კომისიის თავმჯდომარემ ზურაბ ჩიკვილაძემ განაცხადა, რომ წესი საჭიროებს გარკვეული ცვლილებებს, რომელთა მიზანია, უსახლკარო სტატუსის მქონე ოჯახების მიერ ფართის მოძიების პროცედურებისა და ვადების უკეთესად გამოკვეთა, გამგეობების მიერ განსახორციელებელ ღონისძიებათა დაზუსტება და წესის ისე ჩამოყალიბება, რომ რაც შეიძლება მოქნილი იყოს როგორც განმცხადებლის, ასევე სამსახურისთვის სამუშაო პროცესი. საწყის ეტაპზე მოქალაქეებისთვის 35 ათასი დოლარის ფარგლებში იყო თანხა გამოყოფილი, ხოლო ამ ეტაპზე თანხა გაიზარდა და 50 ათას დოლარს შეადგენს.

კომისიის თავმჯდომარემ სხდომის დღის წესრიგით გათვალისწინებული საკითხი კენჭისყრაზე დააყენა. აღნიშნულ საკითხს დამსწრე კომისიის წევრების სრულმა შემადგენლობამ დაუჭირა მხარი.

მომხრე: 5
წინააღმდეგი: 0
თავი შეიკავა: 0

კომისიამ დაადგინა

პროექტი განხილული იქნას საკრებულოს უახლოეს სხდომაზე ჯანმრთელობის დაცვის და სოციალურ საკითხთა კომისიის უმრავლესობის დადებითი რეკომენდაციით.

კომისიის სხდომის თავმჯდომარემ სხდომა დახურულად გამოაცხადა.

ჯანმრთელობის დაცვის და სოციალურ საკითხთა კომისიის თავმჯდომარე

ზურაბ ჩიკვილაძე